



978270



古椿軒詩鈔

汪洵署檢



光緒辛丑孟秋  
用聚珍版刷印

古之爲詩者非以其爲詩也而爲之發乎情之不容已  
然後言言之不足然後詠詠之雖田野之農夫閭房之  
婦子類皆能爲謠諠以自達其隱衷聖人取之爲後世  
法故曰溫柔敦厚詩教也又曰詩三百篇一言以蔽之  
曰思無邪詩之爲義大矣哉莊君性初溫然長者敦行  
於其家而以其餘施及朋友與余長子宣懷同補博士  
弟子員以通家子禮來見其爲人恂恂如也似不能言  
者及與之言鄉里忠孝節義等事輒津津不去口晚歲

古樵軒詩鈔

叙

家居與校武進陽湖縣志常郡八邑藝文志跡其生平  
行事尤以正人心勵風俗爲己任余聞而嘉之延君哲  
嗣誦芬課季子讀冲和眞摯有乃父風暇出君詩相質  
余愧不知詩展誦一過攄詞樸直寄興深至無妃青儷  
白之俗態亦無饑肝剗腎之苦思夷猶淡宕有清氣旋  
繞於其筆端雖經身世憂患家境艱難一一發之於詩  
絕無憤懣不平之氣流露行間殆有合於溫柔敦厚之  
教無邪之思未可以尋常聲律繩之也因序而歸之

光緒二十有二年歲次丙申仲冬之月同郡盛康撰

光緒庚子暮春之初誦芬有道以尊人所著古椿軒集見貽述舊聞揚先德意未可沒也爰味其詩撫其實彷彿其生平序而廣之曰竊謂教不基之門內則興觀何自而生學不本諸躬行則語言都嫌無味聲爲律而身爲度夫豈偶然言有物而行有恆方稱作者慨自微言放失詩教凌夷疥駱相唾便誇弄筆蹲鴟未識卽欲臨文粗疎則孩兒倒紉放誕則飛卿犯夜鶴聲一一句工則臆儀爲虞獮祭重重品汚則香奩是尙墨其池雪其

嶺毫端幻海市樓臺暮何雨朝何雲舌底蠟良家帷幙若斯之類祇算詩魔莫遏其流遂成文厄以故雕蟲薄技恆見鄙於壯夫假思探驪得珠須奉教於君子則有毘陵莊詢芻先生者家隣東阪派衍南華維是藐孤育於大父吳隱之居喪盡禮童年無異成人茅徵士抬具欸賓珍饌偏先供母食貧力學負薪而翁子猶歌處困研經漂麥而文通還讀詩書滿腹祖武克繩孝友因心人言罔間競說謫仙醉月桃李園開疇期憶弟看雲荆花夢斷天乎難問淚併灑於鵠原命也不猶魂更搖於

鶴唳驚相告者曰盍去諸時則烽火互天鞞鼓動地陸  
平原徙家赴洛感慨偏多蔡中郎亡命奔吳生涯絕少  
小海低唱招漁父以叩須大樹飄零弔將軍其安在於  
是匿跡籬籬之底藏船谿壑之間殘月曉風問今夜酒  
醒何處浮家泛宅豈吾儕族聚於斯燒殘爨下良材漫  
冀知音之遇探取囊中焦飯幸存奉母之遺將曷月還  
歸乎則如天之福也俄而北平兵到南服威行既聞笳  
拍於城闔始唱花開於陌上笑當日黃巾擾擾未抄鄭  
公之鄉指前頭碧柳依依仍返陶潛之宅趨修牆屋還

話桑麻王駕謳時豚栅雞栖亦豔孟光着處蘆簾紙閣  
俱輝大邱長父子蜚聲名教中却多樂地朗陵侯祖孫  
標映松柏下自具清風顧天能齊其不齊而人則痛定  
思痛我何幸而一家無恙世何辜而千里爲墟要惟修  
德以禳之并非有他謬巧耳爾乃慈柔惠下任婢污衣  
慨澗推恩憐盜酬帛敬宗贍族葛藟能庇其本根送暖  
分甘鳴鳩悉蒙其覆翼老猶泣墓栢葉恒枯時或寢苦  
蓼莪幾廢初只門閭被化繼乃鄉里歸仁螳醅每隔籬  
而呼蠶箔雖傾筐不惜盜牛改行恥爲王烈所知宰肉

均分咸曰陳平足法遇人急難則赴義若爭嫉世浮囂  
則立塾勸學夫其以雅以南之會言忠言孝之時薦紳  
固傾蓋論交官府亦造門問道庸知老萊田畔縱繫青  
驄其奈任棠戶邊惟供白水軒冕本塵埃物何妨終老  
於諸生濂洛在几席間早定希蹤於往哲今者通觀大  
畧蒐討遺編驗至性之肫肫穎考叔故能錫類溯高風  
之嶽嶽韓伯休原不求名年復年兮楊子居樂莫樂兮  
黜公咎任教邁時多難窮甚蘆中依然在涅不緇介於  
柳下然或貞而絕俗卽難言德必有隣隱若違親那便

古椿軒詩鈔

叙

三

許文能見性公則振潘岳之辭采喜述家風鑄杜老之  
詩篇憂厯國事由來妙製非托空言孝悌任卹睦嫻如  
公庶云美備嬉笑怒罵痛哭觸處都是文章義苟關乎  
勸懲事必形之獻詠大抵發奮之所作能毋同感於斯  
文嗟夫志以高而邈壽詞以苦而逾好盛年多搖落之  
歎此憾僉同潛德無不發之光其理堪信方干補科名  
於死後儻邀闕北之恩羅隱覘經濟於生前饒賸江東  
之集集也目蒿濁俗徒嘅古初心醉佳章儼嘗雋旨知

等盲夫之捫燭始敦老嫗之談詩腐史其補編不我竊

比好事儒者左賦卽增價矣世自有元晏先生是爲片  
昭陽鄭國珩楚白氏謹撰

古梅軒詩鈔

叙

四



莊性初古椿軒詩鈔序

昔顏之推集子思魯爲序陸務觀詩子子篋刻之九江  
其文集子子遙刻之溧陽韋處厚子正蕃以父集求序  
於李翱十年不得終以翱言別求於劉賓客禹錫之數  
人者揚先德以昭前徽近今殆罕其儷矣茲乃於陽湖  
莊誦芬貳尹得之莊氏爲邑望閱誦芬早游黌文名藉  
甚亦其族之表表者也余權篆是邑誦芬來謁出其尊  
人性初明經古椿軒詩鈔相示卽以索序余閱之其詩  
清微淡遠一掃近代蕪穢之習信可傳矣非惟其詩可

古椿軒詩鈔

序

一

傳也其人情情有盛德事詳汪淵若編修所作傳中始  
余下車卽聞父老嘖嘖稱莊鄉董賢詢所自僉謂性初  
董鄉事三十餘年不奔競不武斷不假公以營私儂子  
戾夫聞風胥格里闕有爭訟者得其一言靡不帖帖然  
服今沒已五年矣猶稱道之不去口烏虜有德如性初  
豈沾沾以詩見哉誦芬嗣爲鄉董公正有父風又能哀  
輯遺編揚先德以昭前徽與思魯諸人後先媲美可不  
謂賢與傳曰揚父之美禮曰成親之名其誦芬之謂乎  
余愛性初之詩尤重其爲人且幸其有令子也故爲數

言弁其端光緒三十年歲在甲辰孟春之月古鄉子國  
孫友萼序

古橋軒詩鈔

序



二

題詞

一番小劫說桑田

謂庚申常州失守事

文采風流尙儼然莫惜光

陰如水逝長留詩句比城堅篇題猛虎應多感曲唱啼

鴉更可憐

皆集中篇名

哭弟憂時無限意豈徒問答暮春天

有送春并春答詩

雅望蘭陵已久馳古椿軒集至今知寫來東

阪橋邊景留得幽齋壁上詩

幻見集中

莊子應推齊物早

讀有

南華詩

陶公猶愧去官遲

有鼎陶詩

英英令子承家學有待題

名更不疑

奉題

古椿軒詩鈔

題詞

詢芻明經古椿軒詩集卽用集中卽事感賦詩原韻

曲園俞樾

題詞

不盡滄桑感澆愁酒獨清朝川添畫稿

集中即景詩有王摩詰畫

意彭澤擁詩城

集中五古純是學陶而神與天隨讀之令我塵襟俱遠

露湛綸音

錫旌表節孝母範永芳

霜鎔劍膽傾

先生遇事衡平片言排解里人或推重之

家箴傳

孝友薛鳳早題名

賢嗣誦芬茂才克承家學上年湘賑勸捐業經盛杏蓀京卿附案奏保奉

丞選用

識面嗟何晚論交滬水長

海上逢君匆匆惜別

神摧苟奉倩

先生

悼亡之作情見乎詞

派接孟襄陽聽雨期荷榭歸雲

中江倦遊浩然思返

菊航雙祠遺址在正氣鬱靈光

湯雨生將軍特恩予諡貞愍首卷有會看袋

古椿軒詩鈔

題詞

二

答故將軍之句謹以補註

簿書鞅掌俗慮櫻心奚囊中久無隻句矣 誦芬

二尹孝思不置出示遺編屢徵新詠 雖承囑而

百感憂煎頽唐自媿勉成五律兩章敬題

性初先生古椿軒詩集藉酬宿諾并誌雪鴻庚子仲

秋既望陽湖徐以同齋泉呈稿

余少孤侍祖訓專攻經史兼嗜古近體詩愧少涉獵顧  
性頗耽吟率爾操觚未敢遽呈先大父先大父偶閱數  
章不之怒手示詩學源流而切論曰詩律譚何容易汝  
力求深造毋浪費筆墨也謹識弗諉逾冠以來迭遭變  
故歲甲寅居先大父憂境與事逆抑鬱無聊惟以忝所  
生是懼己未重慈棄養逾年而棣萼俄摧怒焉如擣乃  
悼弟之餘寇陷常州烽火彌天甲裳滿地塗炭流離之  
象吟懷根觸往往發於情不自禁避地秦興懷鄉增感  
泊甲子官軍復郡垣梓里言旋護闈失恃我辰安在命

古椿軒詩鈔

叙

也何如既而濫廁膠庠南闈報罷擬從成均赴京兆試  
未果屏跡里門遂無意科舉之學自揣德薄才疎初非  
誘爲安命而襟懷澹定風雨一編良以無益於得者不  
欲妄求而已迄今花甲周矣往事追維歷歷在目而駒  
光虛擲竊歎故我之依然也諸作散存舊篋本不足觀  
第以境之所值有托而言者居多汰十之三釐爲六卷  
姑錄存之每酒酣耳熱展卷長吟聊供一粲而回溯先  
大父彝訓深慙詩律未精謂爲效顰也可卽以覆瓿也

亦宜壬辰中秋詢芻書於西齋南軒

古椿軒詩文集序

歲甲午郡友有以明醫士劉雲山先生傳一首將謀付梓郵寄商榷畧節而歸之初未暇詳作者誰也既而知爲莊君性初先生所撰君齒視余十年以長淵源家學自早歲已有聲庠序間延津徐進士翔墀令烏程日敦聘佐閩安定夔山二書院士子文居鄉與校武進陽湖縣志常郡八邑藝文志生平言動尤以正人心勵風俗爲己任凡邑有公事成舉以董之殆古所謂老師宿儒善人君子者君實兼焉余方悔前此鹵莽涉筆而君不

古椿軒詩鈔

叙

以爲妄去冬以所著古椿軒詩文集命賢梓誦芬茂才造舍殷勤致辭屬爲論定而序其端余益惶惑不敢當今夫文人好名之心聞譽則喜聞毀則怒比比然矣在賢者觀之譽而喜喜其知己也毀而怒怒其無識也而淺人則不然與所厚者交相譽之與所薄者交相毀之是非得失不係於文而係於聲氣相標榜特此以品題月旦不視風雅爲市道哉若是者縱百喙相和可以掩一時之耳目而終不能移天下之公然而比比然矣嗟

夫務名者實必忘自滿者業必荒問道於盲不如聞歌

滄浪庶幾毀譽兩忘乎昔歐陽氏作尹師魯銘文或以爲不盡歐陽怒而責數之王荆公爲錢公輔母蔣氏銘文公輔意不滿請更益之荆公怒至欲索還甚彙矧喜怒之心在昔名大家猶且不免而余前此鹵莽涉筆君不加怒而且喜焉不獨賢於古人是能毀譽兩忘者也故余序君之詩文不復贊一辭光緒丙申清明前三日無錫教弟劉繼增

莊君家傳

常州府附郭兩縣分治三十五鄉鄉舉董事一人其屬  
圖有正村有保事無公私鉅細咸聽命於董以達於縣  
有古嗇夫三老遺意其大要爲田賦正供由鄉董分限  
各圖各村以時輸將後期者有罰名曰議圖他邑或效  
之不勝弊至懸爲厲禁故東南各行省惟武進陽湖最  
稱易治然所謂鄉董者類皆鄙儻少文選悞不任事依  
回奉法而已無有以材能自見甚或營私緣利欺凌武  
斷爲閭里之害以是讎怨攻訐見輕官吏厯事未久往

古椿軒詩鈔

傳

一

往得罪而去利弊相因大抵然也嗚呼若吾友莊君可  
以風矣君諱善孫字性初號詢芻世居陽湖縣昇東鄉  
茅堰後遷坂上鎮代有隱德家門節行坊表相望自曾  
祖迄君父子五世皆郡縣學生員人尤稱之君生七歲  
而孤中更喪亂勤學治生名譽日起迨入邑庠痛所生  
之不逮見一應省試遂絕意進取常慨世風不古益以  
敬宗收族爲己任凡祠墓之修葺祭掃孤貧之教養婚  
嫁皆力勑其議期於久遠合族化之所志次第畢舉生  
平以篤言行慎交游節嗜欲三者爲立身之要又曰人

生所行孝弟忠信本也文章學問末也事不從性分申  
流出倫常上做起雖名滿天下多慚焉蓋躬行實踐能  
自道其得力處也長吏知君賢延董本鄉事郡城有事  
悉以諮行君董事三十餘年以盛德化薄俗鄉人亦敬  
信愛服迄君之身無爭訟事唐村有執犯竊者長跽求  
釋泣曰自今學好勿以姓名使君知性好吟詠暇以著  
作自娛有就學者隨質施教必準於禮法孜孜不少倦  
其鄉之子弟規行矩步不閒而知爲君門下士也嗚呼  
漢史所傳陳大邱郭有道者惟君兼之可無愧已以光

古椿軒詩鈔

傳

二

緒二十五年八月初八日微疾示終年六十七鄉人赴  
哭思慕遵循日久尙不忍繼君之事其感人之深如此  
先世諱氏具詳譜牒茲不備書元配吳恭人有淑德先  
卒子鍾蔭縣學優附生議叙五品銜候選縣丞孫世琛  
延琛君著述甚富所纂邑志續先賢傳鄉貢考俱付梓  
有古椿軒詩文集及詢芻筆記各種藏於家

汪洵曰余與君同列博士弟子籍初未相知及與君子  
誦芬偕館盛氏留園始爲羣拜紀接其緒論恂恂如君  
子儒也君既下世得觀誦芬所述行畧以證所聞於鄉

之人者傳以厲俗辭無溢美莊氏爲郡城望族閥閱科  
第後光輝映惟君天爵是修子孫孝謹能以文學世其  
家信盛德之留貽過於榮名遠矣

古稀軒詩鈔



三

陽湖莊善孫性初著

男鍾蔭

孫世琛校訂

題畫

巖巖懸瀑布壁立數重山石室俯蘿徑幽人時往還

挽湯雨生將軍 并序

將軍諱貽汾字若儀號雨生祖大奎鳳山知縣

父荀業乾隆時同殉林爽文之亂將軍陰雲騎

尉世職仕至浙江樂清協副將詩文書畫負盛

古椿軒詩鈔

卷上

名譽歸久寓金陵咸豐三年二月髮逆楊秀清

攻陷城垣將軍率眾巷戰眾潰賦絕命詞投雙

祠堂池中死

死或泰山重死或鴻毛輕一死能得所千古有餘榮將

軍忠孝裔臨難不苟生慘傳四十字字字見忠貞我聞

寇未來韜畧慷慨呈元戎一笑置難將口舌爭 壬子冬賊陷武

昌將軍以戰守事宜上書江督陸恐賊有猝至江甯之勢陸突而不用未幾寇大至遂陷

金陵城 江督陸自九江一晝夜遁歸江寧安慶遂潰復撤采石扼險之師江甯因之而陷臣責

非守土臣心可自盟雙祠池畔水一擲憑夷驚死重秦

山否誰歟持鑑衡

金陵烽火連天赤數逢陽九民遭厄虎踞龍盤一旦危  
大府失機罪可磔將軍寓居二十年兵符久解持空拳  
力籌巷戰冀殲賊奮不顧身獨向前事急倉皇暗鬢鬢  
四十字當窮途哭從容一擲逝清波屈指春秋七十六  
公本蘭陵忠孝裔祖忠父孝傳當世公可以生不苟生  
或者死後能爲厲吁嗟乎三世相承古罕聞指日  
王師掃寇氛會看褒答故將軍

江陰道中

古橋軒詩鈔

卷上

鎖岸煙中樹環邨雨後山無心雲聚散出岫不知還

孝婦詞

偶過邨落有婦人泣而哀蓋孝婦代夫養親也  
惜未暇詢其氏族遂作此以悲之

郡邑際兵燹郊野田園荒遺黎面菜色十室九無糧行  
行過邨落有婦泣舍旁欲語復嗚咽此離情慘傷苦道  
夫禦寇被擄去他鄉半載杳音問未悉存與亡龍鍾堂  
上老衰極滿頭霜侍養乏甘旨竭蹶謀羹湯饕殮亦不  
繼丐乞勉提筐赧顏入巨室低聲不敢揚倖得一盂飯

謹以奉尊章家徒四壁立日日持空囊寒冬服藍縷凄  
絕朔風涼微軀詎足惜白髮迫榆桑吁嗟妾薄命艱鉅  
一身當俯仰多隱慮度日如年長窮途痛無告惟有籲  
彼蒼我聞頻歎息不覺淚沾裳

卽事感賦

飽讀詩書隱硯田生涯故我尙依然身經亂後心尤懍  
骨練貧中志益堅菽水權供慈母饌綈袍肯受故人憐  
數逢陽九增惆悵困守蓬廬莫怨天

蒼茫世事歲如馳傲骨嶙峋只自知飲罷三杯新漉酒

古椿軒詩鈔

卷上

三

吟安一字舊題詩經霜瘦葉辭柯早落日寒雲出岫遲  
俯仰鳶魚聊遣興遊心物外復奚疑

王氏四哀詩之三

東甞里王氏予家世姻也今夏四月十七日一  
門殉難者四人予每欲形諸詩卒未暇也率成  
數章不計工拙聊以誌哀云爾

烈女王姑

翼之先生季女幼字惲姓賊  
至懼受辱投宅後池中死

父以不屈死兒何忍偷生秉性本如鐵事急志彌貞盈  
盈廬畔水一擲鬼神驚重泉復見父父亦憫其情會當

立豐碑彷彿曹娥名

節烈徐氏

徐氏生員廷藻先生室青年守節無子重慶和慶成立遇賊罵不絕死

其姜懌守義不愧女中師熊九課二子惟恐荒於嬉不幸遭陽九妾命何足奇身是未亡人臨難無復疑自分惟一死白及甘如飴求仁斯得仁節義信無虧

烈婦李氏

李氏和慶妻奉姑孝謹遇賊被掠過里之後庄橋抱女躍水死

夙昔秉庭訓讀書曉大義四野警烽煙倉皇安所避凜冽似冰霜盟諸方寸地但期不辱身皎然無他意抱女赴深波竟能成厥志一死重泰山徽音嗣何媿

古椿軒詩鈔

卷上

四

酬孫伯聞茂才

傾慕才華自昔年及觀芝宇更飄然從來名下無虛士始信人間有謫仙鍊句天成胸具竹論文風雅舌生蓮草堂過我深投契尊酒怡情澹俗緣

族父苑珊明經七十

棘闈鏖戰氣縱橫那解趨時競後生雅量久經忘得失傳人豈必在科名淋漓翰墨千秋擅瀟灑襟懷四座傾流俗漫云珍待聘誰知聲價重連城

左圖右史富琳琅滿座春風歲月長載酒問奇楊子宅

執經就業鄭公鄉，鴛鴦巧把金針度。雛鳳才憑玉尺量，

扶杖閒看桃李盛。臚傳黃甲耀門牆。

門下多顯達者，若袁榜眼，黃懋尤著。

先子從游溯昔時，恩深兩世荷師資。公眞逾格垂青眼，  
我尙虛名媿白眉。才薄頻煩前路導，曲高那許淺人窺。  
今番樂事逢華誕，快覩光儀介壽卮。

### 西齋題壁

時有禽聲至，疎簾鎮日垂。焚香煙作篆，吮墨雨催詩。僻  
性稽康懶，迂懷顧愷癡。撫還琴<sub>自</sub>晒，今我負心期。

朗初弟歿於客歲三月二十四日，今春條暮年

古橋軒詩鈔

卷上

五

### 矣泣然有作凡五十韻

客歲暮春初，傷懷在手足。瞬息幾何時，冉冉駒影速。吁  
嗟乎我弟，膏肓疾隱伏。甫逾弱冠年，不幸遽無祿。追悼  
汝生平，予懷忽悵觸。先子曩見背，汝始誕遺腹。予亦藐  
無知，長汝歲僅六。汝姊裁三齡，循牆解匍匐。母氏心劬  
勞，抑哀力撫鞠。重闈幸無恙，恩勤藉教育。自汝五歲餘，  
肩隨入家塾。一覽下數行，父書幼能讀。敬聽大父言，拳  
拳必膺服。安肯類羣兒，戲嬉日徵逐。十三能咏詩，吐詞  
燦珠玉。十五學古文，心思繚而曲。臨池仿右軍，瀟灑絕

塵俗植品不猶人素懷虛似谷儲爲華國才充宗親串

卜風雨一燈青同心微蘊蓄努力猛加鞭芳徽踵二陸

家雅聊文學於朗利生後有他日父顏猶未識行看二陸噪江南之句太息數年中大故

痛相續甲寅己未大父母相繼棄養跋臺每透廵寸心似轉轂家學

凜仔肩詒謀念昏夙差慰侍吾母連袂問寒燠色笑承

萱幃家貧安啜菽同被企姜肱對牀希玉局棣萼韡雙

枝庭階恒馥郁方期予與汝白首誼彌篤詎意汝青春

遽爾登鬼錄天既予汝才奪汝抑何酷臨風涕隕之恨

難百身贖幽魂何處招一去杳不復慘見吾母哀悲聞

古椿軒詩鈔

卷上

六

汝婦哭死者果有知應亦難瞑目嗟予生不辰事故罹

反覆頻年守免株捫心赧幽獨自揣無片長難雕等朽

未詩書縱有效猶未遂所欲抑鬱誰與言排悶恃醺醺

酪酌發狂歌淋漓詞滿幅王粲感登樓賈生悲賦鵬回

首永訣時南隄柳初綠流光迅及暮撫事益蠶蹙倦飛

憫斷鴻險走愁鉞鹿瑣尾痛流離高厚形躋跼托居天

壤間於我渺如粟隨遇任自然閒情寄樵牧一尊聊酌

汝清芬薦園藪言盡意無窮淚灑中庭竹

寫懷四首

結廬人境一般閒我周旋俗慮刪竹榻午眠臨北牖  
柴門晨起見南山桃花夾岸橋雙鎖楊柳沿溪水四環  
三徑會逢良友至近游攜手白雲灣  
重重翠影上窗紗簾畔雙飛燕子斜開口莫談滄海事  
委懷且看故園花一籬細雨貓頭筍兩腋清風雀舌茶  
澹極塵緣無芥蒂逍遙人世讀南華

一春爲圃戶長扃蔓草芟除不暫停積雨臺滋三月白  
狂風葉挺萬年青欲嘗世味根須斲偶觸吟懷筆亦靈  
恰嘆遺黎多菜色嗷嗷鴻雁叫前汀

古椿軒詩鈔

卷上

七

昂藏七尺笑吾軀彈指光陰度隙駒寡慾何愁生計拙  
耽吟翻覺性靈迂流離景象同浮梗緘默情懷且守株  
賸有元龍湖海氣不甘降志濫齊竽

侑飲歌

陳以觀醫士工詩畫暇輒偕知己尊酒往還豁  
如也邇持酒戒甚嚴戲作長歌侑飲以博軒渠  
名流酷嗜蘭陵酒佳醞從來無出右矧茲磊塊填胸中  
會須一飲七八斗陳君懷抱追古人岐黃濟世厭清守  
閒來畫水兼畫山自出心裁軼窠臼每當興酣潑墨時

指揮如意丸脫手澹情仕進與世遺入室芝蘭訂契友  
步兵一嘯驚四筵望若神仙數某某我亦湖海氣未除  
濫竽喜步南郭後置酒同斟逸興豪忘年相對交情厚  
偶因監史悟寶筵忽向糟邱自引咎擬和陶令止酒詩  
白衣人送謝弗受我聞供奉酒家眠揮灑百篇抒抱負  
又聞髯蘇赤壁遊慙勲斗酒婦藏久自古才人概若斯  
更添絕藝名不朽將酒勸君聽我歌箇中佳味合領取  
唱隨樂有齊眉妻晨夕幸依偕隱母方今南國困風塵  
引興莫如掃愁帚請君試誦魚麗篇君子有酒旨且有

古椿軒詩鈔

卷上

八

排悶

蒿目流離象閒憑郭外樓江山飲舊恨風雨寫新愁易  
作窮途哭難爲適野謀醉吟排悶句懷古意悠悠

八月二十六日舟泊徐墅有懷同里諸子

出門殊悵悵放棹欲何之權作栖身計彌傷失意時故  
人分手易旅况寸心知小立篷窗畔停雲有所思

旅夜有感

萬木蕭蕭落葉稀中天皓月照柴扉幾回城堞寒吹角  
何處溪砧夜搗衣十載流光彈指過

先大父捐館舍以  
水燈燈在疾寒暑

十易 五湖歸計與心違  
旅窗坐臥思無限  
自笑生涯百事非

送春

幾度留君覓好詩  
今朝真箇別離時  
茶蘼開徧流鶯老  
珍重陽關酒一卮

代春答

雨雨風風節序催  
多卿雅意費徘徊  
臨歧莫怪恩恩別  
依舊明年有脚來

種菊

古椿軒詩鈔 卷上 九  
梅花品孤高菊花品奇逸  
古來隱君子吟賞無虛日  
正以氣味同愛此清幽質  
一則魁早春羣芳讓傑出一則  
殿晚秋冷香故無匹  
安得二難并掩映輝陋室  
姑以聽諸天此願人難必  
余性耽迂疏舌耕氣佔畢  
窗前偶佈置種菊不嫌密  
汲水溉兒童培養時無失  
待看花發時滿眼天機溢  
先援梅花例揮我五色筆

猛虎篇

深山有猛虎  
驍悍不可羈  
高居山之頂  
孕育蕃且滋  
一旦縱羣醜  
四野紛驅馳  
虎目視耽耽  
其欲無厭時  
惜哉

無馮婦攘臂以攫之眾人色雖厲羊質而虎皮一聞聲  
咆哮隨風盡離披不能入虎穴何能得虎兒任他上游  
據易種成禍基虎眾斯人寡無所展其奇世卽有馮婦  
獨力固難支

啼鴉曲

朝啼鴉暮啼鴉鴉啼一何苦咄咄令人嗟紛紜世事慘  
多故天荆地棘眼前路鴉聲且勿辨吉凶如呼寐者使  
之寤君不見人心叵測機變生何若澹泊全其貞履霜  
冰至禍潛伏試聽啼鴉不住聲

古椿軒詩鈔

卷七

十

寄內兄吳薇卿明府浙東

一官羈越水不見十年秋世事浮雲感閒懷落日愁思  
鄉知灑淚報國賦同仇聚首他時願相攜物外游

秋日偶成

黯澹天光晚照明一行雁字半空橫蘆花臨水秋無際  
蕉葉吟風夜有聲是處浮雲迷北望幾時零雨罷東征  
掃愁端藉杯中物誰識窮途阮步兵

菊

萬木蕭疎徑就荒秋深老圃一枝黃非關絢爛眞佳色

不慕榮華合澹妝傲骨天成甘隱逸高懷霜冷耐淒涼  
偶羈籬下人休笑品格清奇晚節香

紅葉

依彼平林俯野亭一番霜葉鍊成形堅持晚節心懷未  
豔奪春花眼待青耐冷那輸籬畔菊飄殘不作水中萍  
江山莫道秋容澹爛漫千枝列畫屏

讀南華

南華方夜讀兀坐炯雙眸書爲文字祖縱橫筆力道澹  
懷寄濠濮於世邈無求千金却楚使高踪追許由爾時  
亞聖氏惓惓世道憂游梁歷齊宋思一展素猷吁嗟生  
並世惜未一面謀迄今千載下望古心悠悠讀至神會  
處拍案解我愁蒼茫人間世且作逍遙遊

行路難

君不見魚投網掉尾空作江湖想又不見雉罹羅蹈危  
出自無心多有形羅網險如許無形羅網將奈何吁嗟  
世路有通塞陡然平地叢荆棘前避熊虎後豺狼進退  
兩窮機莫測古今何限行路難志士慷慨憂百端奮袂  
爲君歌一曲四座聞之應膽寒

輓徐烈婦

烈婦談氏同里徐榮桂妻賊掠鄉閭矢志不屈  
投水死時庚申四月十七日也年二十歲

殉名緬烈士殉節褒忠臣閨閣有至行義在不辱身嬌  
矯徐烈婦淑慎葆性真娉婷年及笄結褵婦道循一旦  
遭陽九四壁揚烽塵臨難矢靡慝倉皇投水濱舍生始  
取義聞者咸愴神吁嗟烈婦志一死彪于春卓然砥名  
節奚愧爲完人

慕陶

古椿軒詩鈔

卷上

七三

陶靖節樂志隱居千古高士也率賦二章以志

企慕

解組歸田跡隱淪結廬人境著閒身折腰肯作風塵吏  
樂志原同太古民領畧琴書心自遠盤桓松菊氣逾親  
尋源好趁桃花水爲訪武陵黃道真

思亡弟

不復見吾弟恩恩兩度春青年悲永別白首更誰親憫  
汝生前志傷予亂後身兵戈猶滿眼撫事益酸辛

春感

寇氛未靖逼煙塵村墅荒涼百感新千古忠魂凝碧血

謂殉難諸君

二更野鬼哭青燐此離景象無虛日黯澹風光

不當春塗炭生靈流毒慘紅羊浩劫果何因

### 卽事

新晴天氣佳緩步適茅堰日暮烏知還余亦歸東坂門  
前車轍深有客來自遠促膝坐談心翻恨相見晚剪燭  
斟芳醕幽懷忘優蹇今茲畏路多小築任栖遯得志會  
有期那甘自貶損飲罷月三更唱酬意繾綣祇恐明日  
離未盡抒積悃

古橋軒詩鈔

卷七

七

### 望雨

低田半插秧高田多曠土曉夜桔槔聲蟬聯鳴水許渴  
望梅雨來先期祀田祖薄暮布脣雲初更月又吐水涸  
良堪虞惻惻憫農父郊原蔓草滋耕耘終莽鹵兵後歲  
浮饑何限流離苦道逢樵者言喜見商羊舞明日一陰  
生定有頭時雨

### 晚步

傍晚渾無事微吟過埜亭輭風三徑竹細雨一谿萍興  
到詩仍鬱愁生酒不靈南山隨指點突兀數峰青

寓感

世事驚滄海秋風吼石尤霧迷千里目浪捲五湖頭畫  
角聲聲怨新詩字字愁蕭條桑梓景何日靖戈矛

懷友

攜手河梁記昔年今番濶別舊情牽一湖秋水清如許  
人在蒹葭何處邊

秋日寄感

無邊落木響颼颼豺虎縱橫歲復秋南國江山千古恨  
西風砧杵萬家愁栖遲無地羲皇侶康濟何人管樂儔

古椿軒詩鈔

卷上

十四

彌望寇氛雙淚眼幾回悵夕陽樓

秦興道中

瞥眼東方白蓬窗冷露盈一篙秋水漲十里曉舟行江  
靜漁歌起天空雁字橫中流誰鼓楫翹首望澄清

旅感

撫景無窮慨驚心節序更晚風梧子墜新雨稻孫萌天  
塹秋潮急鄉關宿霧橫何時軍奔幟一爲取龍城

吾郡號龍

城故襄  
杜句

卽事感懷

列郡干戈擾烽煙慘不收龍城名畏路虎阜巖荒耶征  
士三年淚流民萬種愁跳梁原小醜解散有奇謀

曾制軍設

法藏賊著  
有解散歌

### 次韻酬友

干戈擾攘十年餘風鶴聲每警予無地卓錫心益壯  
有懷投筆計仍疎蹉跎豈爲耽書早憂患原從識字初  
賦到江南何限感月明還憶子雲居

### 枕上

旅夜愁懷曉漏遲睡餘枕上細吟詩五更風冷雞三唱

古椿軒詩鈔

卷七

五

江浦寒潮欲上時

### 江邨散步

江水抱邨流早晚潮來去閒携酒一壺長嘯竹深處  
一葉蒲鞵舟過江泊水潄殷勤問故鄉只道流離苦

### 懷鄉作

江岸黃昏畫角哀興懷故國更低徊淒涼郊野荒禾黍  
黯澹湖山鞠草萊幾載烽煙迷劔井何時流水奏琴臺  
艤舟亭畔游蹤罕殘桂秋風仍自開

### 泰興旅感

江天薄暮雪霏霏風撼蓬窗半掩扉  
旅跡有年頻轉徙鄉心無日不思歸  
詩成嚼蠟聊揮管囊澀飛舄且典衣  
差幸全家免離散晨昏侍膝戀諷闈

莽莽乾坤患難身倚樓南望黯傷神  
長江自古雄天塹故國何時弭劫塵  
泰運來年逢甲子壯懷往事憶庚申  
畏途蛇豕終殲滅準擬言旋奏凱晨

### 官軍克復常州

龍城一戰磔渠魁喜見江干捷羽來  
醜虜空羣無豕突創夷徧野有鴻哀  
雨暘應候消兵氣

李中丞岳八雨禱於神天忽大霽得

古椿軒詩鈔

卷上

去

奏奇勛

時日乘機盪瓊灰

郡城於庚申四月六日失守仍以今夏四月六日克復

慰

甚慈親開笑口舉家買棹故鄉回

古  
粹  
軒  
讀  
鈔

汪  
洵  
書  
齋



光緒庚子中秋  
用聚珍版刷印

陽湖莊善孫性初著

男鍾蔭編輯

孫<sub>世</sub>琛校訂

金陵寓舍次韻酬孫遂舫明經見贈之作

涵今茹古幾多年養到機流氣浩然筆豔長庚花上露  
藜吹太乙杖端煙性天閒澹風清座心地光明月印川  
此度定堪登桂籍况逢盛世正求賢

溪橋晚眺

溪水瀠洄鏡面同小橋曲岸四無風夕陽漁艇橫波綠

古椿軒詩鈔 卷下

柳蔭垂竿一釣翁

平隄掩映徧桑麻天氣晴和絢晚霞一縷炊煙茅舍起

新邨面水兩三家

舟行卽事

靄靄晴雲澹澹風泛舟一路水光融幾番打槳輕煙破  
十里揚帆曲港通魚咬新蘋波影綠蟬吟古柳夕陽紅  
蓬窗縱目情何限江上青峰點染工

新秋

小院驚秋至西風撼綠楊逢庚三伏暑過午一番涼砌

畔蟲聲起雲邊雁字揚夕陽隨指點遙嶺色蒼蒼

送劉竹塘少府之烏程

名都壯歲展才猷龔尉今檄苕溪賦宦游枕簟風清三

伏暑琴尊雨潤五湖秋鵬程定遂雲霄志鳳侶聊為枳

棘謀壤地相連睽咫尺他時良晤話綢繆

重九日偕鉅光祿泛舟周橋

好趁題糕興清溪打槳行岸低秋水澗山近夕陽明啜

茗譚衷曲揮毫抒性情揚帆過白蕩一路晚風迎

志館偶吟

古橋軒詩鈔

卷下

歲在丁丑續修武陽縣志王司馬小霞吳同轉

又樂兩邑尊邀余赴館偕同學諸子分校

義例精詳踵舊修舊志李申者太史修今番編纂預綢繆按圖雅

擅湖山勝掌故端資筆墨優兩邑人文經采輯一函兵

燹幸傳留舊志多散佚惟存先大父笠樵公校正全涵局中藉資考證才疎我忝齊

竽濫願其諸君細校讎

第一孫生誌喜

頗慰懸弧望門庭喜氣盈方思娛老計幸遂抱孫情吉

夢熊符兆祥徵虎錫名歲在寅取名炳虎洗三具湯餅宴笑試

啼聲

悼吳孺人

昔黃門哀感思切望廬元相悲懷淚滋營奠景

淒涼而易拂志抑鬱以難舒未免有情誰能遣

此僕少年鳳卜早牽繫足之絲中歲鸞離遽輟

齊眉之案徽音絕響寶鏡韜光詎一死無知忘

情往日縱三生有約覲面何時兀坐終朝幽思

一縷聊自揮其枯管俾雜綴以蕪詞云爾

秋閨韻杳瑟琴弦我獨何能無慨然慨同句本南華三九年華

古椿軒詩鈔

卷下

三

渾似夢不堪回首菊花天孺人為予伉儷僅二十有七年

伴讀青燈刺繡頻追惟往事淚沾巾終天抱憾情何限

同是髫齡失怙人予與孺人皆少孤語次輒感未逮事舅

聯床風雨首重回春暮驚心棗萼摧茄苦成吟深慰我

駒光珍重及時催庚申三月予弟朗初病歿孺人慰予詩有珍重駒光期努力之句

流離瓊尾跡何堪舉校齊眉苦亦甘桑梓頻年風鶴警

愁從江北望江南避地泰興懷鄉增感

辛勤十指不停鍼勵守清貧志念深他日幸酬借老願

終身藜藿也甘心孺人勤女紅厲志安貧

傲骨憐予太瘦生沉疴忽起劇關情中宵露禱將身代

一片丹心鑒至誠

余甲子大病孺  
人力禱方痊

含飴子舍貌清癯顛顛秋風惜病軀詎料瑤池催鶴馭

反魂無術付長吁

戊寅冬杪慰弄孫之望痛人意  
念頗舒今秋抱恙遂永訣傷哉

題先君子手錄格言冊後

莫作尋常筆墨觀反身自省力行難格言苦口眞良藥  
不數仙家換骨丹

壽謝丈厚菴司馬八十

騷壇毫歲快論文大雅眷容迥不羣人羨歸田膺厚福

古橋軒詩鈔

卷下

四

我慙下里揖清芬春風杖履吟忘劬秋水襟懷德可薰  
北海金樽傾坐客原來冠蓋集如雲

初夏

容易春光老長嬴夏令新薔薇紅壓架楊柳綠迷津傲  
骨安吾素清心澹俗因經旬身抱恙祇與藥爐親

病愈率成

小愈防加病斯言座右箴耽閒消客慮習靜養吾心有  
酒還邀月無絃偶弄琴采薪憂頓釋厚誼感知音

病愈作

病卧十餘日藥餌資養陰扶起足無力赳赳難爲禁雙  
弓啜少許靜坐觀我心心清體自適塵俗毫無侵窗外  
盎生意花木影森森時聞鼓巧舌載好黃鸝音閒中領  
佳趣聊以舒胸襟霍然病初愈營衛憂轉深朋儕寄語  
我攝生良足箴

端五後一日泛舟赴奔牛

郊外雲騰雨欲濛揚舲忽度古飛虹

古飛虹橋跨文成里

一聲款

乃輕煙散雜堞嗟峨日影紅

寄親家劉別駕

古橋畔詩鈔

卷下

五

客秋枉顧便相離又見春風拂柳絲日暮浮雲千里隔  
天涯明月兩心知功深藝苑才華富化洽名區展布奇  
我儻來遊探勝蹟瀟湘懷古和題詩

齋居無事撫今追昔怛然有觸於懷揮毫書臆江

管無花工拙非所計也凡四十韻

代嬪年華迅浮生老大傷蹉跎思往日荏苒惜流光世

業清芬道家聲義行彰

高祖昇霞公以義行著邑志有傳

慎幾端器識

務本抑詞章遺豈金爲貴耕惟硯不荒析疑探藪架考

信證曹倉舊德何由繼前型未敢忘聰聽先祖訓佑啟

後人良弓治風非渺淵源澤孔長傳薪開絳帳累葉守

青箱曾祖俊民公大父笠樵公先考稚歲悲孤露重闈

苦備嘗先考見肯善甫七齡蒙大父母暨先妣張孺人教養成八艱辛備歷經畝懲鹵莽

藝苑誨精詳循序功潛誘詒謀願待償父書勤發篋童

試盼游庠善初應童子試大父期望甚切逮事居憂感涕離警寇狂咸豐

甲寅己未大父母相繼辭世逾年罹庚申之變龍城憑豕突馬蹟徧鳴張玉石

焚俱慘風雲測未遑白頭空敵愾黃口亦遭殃鄉民起

布裏首為號禦賊於坂上鎮破戕自盡者無算婦女率多不屈死嬰兒亦不免瑣尾何多日浮

蹤歷幾霜庚申熾烽燧甲子掃欃槍自庚申郡城淪陷迨同治甲子恢復

古椿軒詩鈔

卷下

全家僑寓泰輿數載凱捷揚旌旆時平戢斧斯鴻噉真可憫燕賀

競相慶詎料歸東阪俄教痛北堂甲子四月望後旆里五月八日居先妣憂

呼天聲飲泣捨地淚盈眶養教同歐母劬勞媿敬姜蟻

光貧紡績烏哺奉羹湯勁節松筠志堅衷鐵石腸令儀

咸仰範旌典永流芳先妣於壬申旌表如例素赧才蕪陋空斬

學就將始衰笑櫟樗非晚慰榆桑秃管詩題簡新醅酒

引觴懶疎嵇叔夜痴絕顧長康鸞鏡殘虛匣鴛幃冷洞

房光緒己卯余抱鼓盆之感陶情聊自遣知足復奚望課子頻繙帙

娛孫迭弄璋閒參齊物論靜悟養生方安命希鵬息興

懷愴雁行

朔初弟力學早世

塵途知易險世態閱炎涼胞與心

終赤頭顱髻漸蒼琴書供頌畧隨境樂徜徉

家德儕比部挽詞

肩隨雅範最情親哀訃俄聞淚滿巾  
經籍沉酣言有物文章渾灑氣如神  
圭璋令望追前輩簪笏休聲啟後人  
惆悵風流今頓盡手書遺墨久彌珍

君工漢隸頁盛名

中秋日劉竹塘少府同遊陸氏園林

蹟遺承旨緬風流

相傳闕為趙文敏孟頫遺址

為訪名園載酒遊松

蓋陰繁蘿徑靜桂林香馥竹亭幽一池活潑知魚樂五

古橋軒詩鈔

卷下

七

石玲瓏有鶴留

庭前五石挺立有鶴棲其旁

豪飲紗窗多逸興果然

佳景豔中秋

署齋題壁

虛負平生志琴書且自娛解煩茶正熟寄傲菊同癡旅

感驚秋晚鄉思與夢俱幼孫侍晨夕耽讀頗矧劬

虎孫方十

嶽隨侍讀書

五人墓

璫醖彌天元氣戕五人大義植綱常豐碑突兀山塘路

尚有鶯花用夕陽

立秋日寄蔭兒吳興

一葉飄梧院崇朝暑氣收逢庚交未伏近午迓新秋

是日

逢庚爲未伏  
午刻交秋

細雨茗溪路清風笠澤舟鄉心應更切撫

景莫遲留

本是壤相接歸航迂道行鶯湖秋水濶虎阜暮煙橫郵  
報頻番信颿懸數日程新涼天氣爽一慰倚闌情

題古椿書屋校書圖

己卯中秋郡城某生爲余寫照甚肖越歲梁谿

胡君瑞芝過阪蔭兒屬繪是圖從余好也迄今

古椿軒詩鈔

卷下

八

恩恩逾十稔矣展覽之餘率題俚句以博軒渠  
歲在己丑夏五

小幅披畫圖丹青擅妙筆形神望儼然心裁喜獨出伊  
昔繪吾眞行年四十七而今閱歲華蹉跎將六秩兀坐  
斗室中隨遇審客膝文史羅心胸縹緗積卷帙校書獲  
益多莫但詡佔畢斯夕課兒孫菑畚待秋實烹茶香微  
薰洗硯趣更逸烹茶洗硯  
悉圖中意時還訂素心樽酒永佳日今  
我仍昔我蒙叟養生術願共庭前椿年年挺秀質

題齋壁

蟄居怡養性中天分外無營任自然虛已十分方受益  
讓人一步勿爭先物情未免求全毀吾道何堪見異遷  
得失忘懷安我素福田培植在心田  
躬修方寸力操持踐履還防意見歧文子再思斯可矣  
武公抑戒孰如之酸醜世味何須識澹泊襟懷只自知  
陶令一言深牖我樂夫天命復奚疑

除夕

此夕非常又今年又一年祭詩懷島佛題句仿坡仙影  
耀通宵炬情娛守歲筵更深驚爆竹風俗舊相沿

古椿軒詩鈔

卷下

九

蝴蝶花

點綴芳庭占一隅幻情栩栩玉腰奴定從蒙叟催回夢  
可仿滕王搦入圖柔態每憑風蕩漾嬌姿不礙雨沾濡  
善權寺裏留遺迹笑問花魂似舊無

善權寺  
隸義興

偶成

不知老將至雙鬢漸成絲縱使胸懷壯無如血氣衰右  
牙驚墮早

去臘落  
一右牙

左足訝行遲怡養無他策身心好自

醫

盛丈旭人方伯偕同里致仕諸君年逾花者九

人會飲於暉莘農廉訪之靜園繪長生九老圖  
以園在長生巷也令嗣徽生部郎徵詩次韻賦  
和

宦成名立節彌堅杖履優游閱大年林下盍簪都壽耇  
座中聯袂集神袖耽吟白傅堪追步暢飲洪厓可拍肩  
一幅丹青圖九老鄉邦韻事豔相傳

題許太眉徵士東夫山堂詩集

毘陵詩國幾傳人誰似鴻篇骨格真著述等身言有物  
指揮如意筆無倫陶潛懷抱功名薄庾信文章閱歷新

古橋軒詩鈔

卷下

十

丁卯一編長浣誦春風坐我感前因

昔晤丈於盛氏書局叨承青睞今丈

下世十  
餘年矣

舟行卽事

殘暑過三伏新涼好放舟輕帆數點雨長笛一聲秋蓼  
岸低飛鷺蓮塘靜浴鷗扣舷多樂趣雲水豁登眸

述懷

年華駒影太恩慙彈指俄成六十翁聊慰舌耕甘澹泊  
未能耳順學癡聾家聲幸賴詩書澤世德期敦孝友風  
少壯依然今老大有懷明發省吾躬

邑經兵燹幸安全桑梓依稀似昔年種秫祇餘田十畝

編茅聊芘屋三椽衡文講院頻揮翰余曩游湖郡延津徐君鞠暉以進士

宰烏程一見如舊相識嘗囑余評臨變山安定等書院課藝接武蠻宮願著鞭陸兒

使王逸梧祭酒拔補弟子員籍倍深期望斯夕兒孫長侍膝躬修積德愧前

賢

家住毘陵東阪西蕭然環堵面南隄南隄柳色為東阪八景之一蓬

蒿繞宅開三徑楊柳垂門映一溪縱望雲山供嘯傲閒

緡經史博參稽桑榆非晚行吾素秃管吟成句漫題

車馬無喧境地眞明窗淨几雅宜人長年領畧琴尊趣

古橋軒詩鈔 卷下

十一

勝日娛游杖履春遇感馮唐知易老情同原憲不妨貧

樗材自笑支離甚耽讀南華羨大椿

空中漫興

養日園成趣居然暑氣消雲烟涵苦竹風雨戰甘蕉影

戢棲梁燕聲傳抱葉蝸層軒最幽敞靜坐隔塵囂

臘月十四日立春

冬杪更陽律居然淑氣催今晨殘臘盡隔歲早春回問

訊風前柳攀尋雪裏梅誕辰酣飲與朋舊樂銜杯是日即余

辰生

予誕生癸巳今歲重開花甲而蔭兒亦屆四旬矣  
賦長律示之

齒逾花甲莫疑年負却驕光意惘然我以衰孱羞挾策  
汝方強仕努加鞭商量舊學探文苑落拓生涯守硯田  
士貴通經期致用何時奮迹鳳池邊

偶興

煙景晴和到處同踏青小立畫橋東半空數點柳絲雨  
五日一番花信風帆影鴨頭新水綠篋聲牛背夕陽紅  
閒來世慮憑消遣習靜磯邊作釣翁

古橋軒詩鈔

卷下

十三

卽景

回溪環堵敞吾廬隨境棲遲慎起居簾捲蝦鬚新雨後  
爐烹雀舌晚晴初耽閒便覺天機活省事常留地步餘  
自笑疎慵徒食粟一編手校養生書

春陰

花信頻番令春陰鬱不開經旬三度雪先蟄一聲雷世  
事懷多感年華鬢易催呼朋聊縱飲撫景莫辭盃

寄汪淵若編修

泮水同游記昔年羨今秘閣譽青錢窮經我向雲泥隔

砥行君真器識先早飲香名班玉筍定邀榮遇撒金蓮  
郵筒漫把蕪詞寄幸賴鴻裁筆似椽

附和作

併跋

性初先生昔歲同列博士弟子籍三十年來蹤迹  
疏濶茲來寄居留園獲交令子誦芬出示先生詩  
卷多樂志適景自道性靈之作所謂黜陟不知理  
亂不聞致足羨也復承寄贈一章塵海浮沉感媿  
交集率書奉和聊以達意知無當於大雅庶不負  
此深情而已

古椿軒詩鈔

卷下

三

風泊鸞飄感暮年倦游尙乏買山錢名園許我常爲  
主清福輸君獨占先舊學傳芬庭列樹新編吟粲舌  
生蓮相逢塵海都愁侶棲隱還從乞一椽

中秋日懷傅子巖廣文

林園好景桂花稠吟賞良辰興不侔到處春風永今夕  
一年明月又中秋伏波垂老鞍猶據定遠懷才筆欲投  
尊酒論文酬素願思君便擬駕扁舟

霜降

晚節霜初降西風送夕暉  
一秋蟲語碎九月蟹螯肥石

瘦山容澹林疎樹影稀東籬香可挹菊興每依依

題隔溪漁舟圖

斜風細雨中一艇一漁翁傍晚泊何處清溪東復東

湘生表姪爲余繪詢芻圖饒有機趣率題四韻集

司空詩品

亂山喬木蓬蓬遠春一客荷樵妙契同塵取語甚直識

之僉眞超以象外載歌幽人

齋居

小空容膝肯求安門對溪山眼界寬十月芳梅剛應暖

古椿軒詩鈔 卷下

一冬瘦竹不知寒避暑袖手觀棋局寄傲襟懷倚畫欄

賴有素心晨夕伴怡情三徑足盤桓

等閒歲月自駸駸鏡裏衰顏兩鬢侵舊學守株還積習

新詩脫藁且長吟秃毫敢詡江郎筆焦尾空懷蔡氏琴

塵世蜃樓都幻境何如寡欲養吾心

遣哀

悼繼室  
毛孺人

祥微夢曰遽分離嗚咽鴛幃不自持記否三生曾有約

忍言一死便無知

家頌仙太守招飲

廿載萍踪濶何從數夕晨同宗原夙好異地轉相親偉  
餞舉觴促雄談驚座頻佇看膺薦墮霖雨展經綸

家聽臚上舍遺照

衡門小隱碧溪傍想見當年興味長綠樹拖邨初夏雨  
黃花面圃九秋霜胸懷澹定琴三疊境地清閒酒一觴  
今日披圖深足慰庭階蘭玉燦呈祥

臘八日雪

朔風何料峭寒氣襲窗紗飽啜雙弓米紛看六出花墨  
池冰欲凍爐火炭潛加霽色溪橋外南山晚照斜

古椿軒詩鈔

卷下

五

論詩

作詩本言志端貴命意精妙語造自然不假雕琢成遯  
古及唐詩誰足繼其聲體裁別真贗千古有定評余夙  
耽吟咏少作笑平平而今成老大結習殊未更哦成五  
言體詎謂匹長城時還搨枯管不平假以鳴明知才已  
盡聊以抒性情異時供覆瓿遑計身後名

偶興

眺望情何限晴空澹夕暉煙林鴉陣合雲路雁行飛長  
笛何人弄孤帆此處歸晚來催飲興聊掩故園扉

跋

先君子學有根柢幼卽耽詩自遭粵逆之亂輾轉偕隱  
備歷艱辛迨寇平旋里蟄居數十年命途多舛而物我  
胥融隨在以廉讓自抑淡泊寡營素性然也惟道味愈  
甘天懷愈篤感時紀事都付長陰風雨一編至老勿劬  
嘗手著古椿軒詩六卷恆以未獲刪定爲憾去冬陰由  
蘇垣留園移館郡城得與馮石溪世叔晨夕往還情誼  
較密因出原稿乞爲酌選今春復經鄭楚白徐蕢泉兩  
先生鑒定謂集中名句純寫性靈自得廬山眞面凡酬

古椿軒詩鈔

跋

一

應之作又汰十之三而先君已去秋見背蓼莪增感  
痛何忍言所期手澤常新展卷如聞宗旨更荷諸賢推  
誠相貺雖一再遴削而魯靈光殿巍然獨存尙簡不求  
多仍繹庭訓也爰急就聚珍板印如千冊藉可傳世伏  
念先君子遺稿盈篋暨古文雜著亦皆朗若列眉他日  
次第彙編續登剞劂且將永垂不朽卽以此爲嚆矢又  
幸矣光緒二十有六年庚子中秋月上浣男鍾蔭謹誌



1.40